

Канон Пресвятой Богородице в честь ее иконы «Неупиваемая Чаша»

Память празднуем 5 (18) мая

Канон, глас 4-й

Песнь 1

Ирмос: Отверзу уста моя, и наполнятся Духа, и слово отрыгну Царице Матери, и явлюся, светло торжествуя, и воспою, радуясь, Тоя чудеса.

Припев: Пресвятая Госпоже Богородице, услыши молитву раб Своих, молящихся Тебе.

Ангел вопиаше Тебе, Дево Чистая: радуйся! Мы же что Ти принесем, благаго Царя благая Мати, яко явила еси нам в сия последняя времена сокровище неоскудное – чудотворную икону Твою на освящение и исцеление душ и телес наших.

Пресвятая Госпоже Богородице, услыши молитву раб Своих, молящихся Тебе.

Ты буди нам утверждение и в бедах скорое заступление, Царице Небесе и земли, на Тебе надеемся, непрестанно моляще Твою благостыню.

Пресвятая Госпоже Богородице, услыши молитву раб Своих, молящихся Тебе.

Богатство духовное неизживаемое даровала еси рабом Твоим, Жизнь рождающая, пренепорочная Чистая Дево, икону Твою священную, еяже прославление светло празднующе, вернии, избавляемся от всяких бед и скорбных обстояний.

Пресвятая Госпоже Богородице, услыши молитву раб Своих, молящихся Тебе.

Святая Владычице, Пречистая Бога нашего Мати, всех Творца неизреченно рождающая, моли всегда благость Его страстей нас избавити и оставление грехов нам даровати.

Слава: Озари, всепетая Дево, чистшая светлостей солнечных, слепотствующий ум наш разумом истиннаго Боговедения, да не погибнем люте во гресех наших: помыслы благочестия сердца наша просвети, да, спасшися Тобою, радостно возгласим: слава силе, слава и милосердию Твоему, Господи, Благодетелю всеблагий.

И ныне: Молим Тя, яже прежде век избранная в Матерь Господа, исцели расслабленная грехом души наша, оживи росой покаяния сердечнаго и молитвы слезной, укрепи в сердцах рабов Твоих веру истинную и любовь нелицемерную, да сподобимся подвигом добрым подвизатися, веру непорочну соблюсти, житие мирно скончати, хваля Господа: слава долготерпению Твоему, Спасе наш.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Песнь 3

Ирмос: Твоя песнословцы, Богородице, живой и независтный источниче, лик себе совокупльшия, духовно утверди, в Божественней Твоей славе, венцев славы сподоби.

Пресвятая Госпоже Богородице, услыши молитву раб Своих, молящихся Тебе.

Достойно есть величати Тя, Богородицу, даровавшую пречистый образ Свой в помощь и Божественное заступление святей обители сей от враг видимых и

невидимых.

Пресвятая Госпоже Богородице, услыши молитву раб Своих, молящихся Тебе.

Богоначальным мановением святая икона Твоя, Владычице, от лет древних хранимая, ныне, яко чаша, благодать Твою обильно изливающая, есть достояние обители Твоея, темже благочестно прославляюще Тя, Богородице, достойно величаем.

Пресвятая Госпоже Богородице, услыши молитву раб Своих, молящихся Тебе.

Не остави нас, Богородице, нечистыми страстями влятися, не остави в беззаконию наших погибнути, но молящихся Тебе житие свое исправите научи и Твое милосердие воспети достойно.

Пресвятая Госпоже Богородице, услыши молитву раб Своих, молящихся Тебе.

Человеков молитвы и Ангелов славословие, Владычице, приемлющи, и моего убогаго не отврати моления, скорбь души моя утворяющи, паче же терпение в скорбех присно мне подающи.

Слава: Владычице Пречистая, елика просим днесь от Тебе прияти, сия от чудотворныя Твоея иконы нам подаждь, и немощное наше произволение утверди, и небесных благ желание в сердца наша всели.

И ныне: Нашему спасению буди, Богородице, ходатаица и наставница, но и телесныя нужды и болезни наша исцели; зане маловерни и нетерпеливи суще, помыслы уныния в бедах наших вдаемса и наипаче терпения дар у Бога просити требуем.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Господи, помилуй (*трижды*).

Седален

Яко воистинну Божественное украшение Церкви и залог милости Твоея к христоименитым людям икона Твоя, Богородице Дево, показася: всяк бо, с верою к ней приходяй, в недузех исцеление, в скорбех утешение, в бедах вспоможение от Тебе скоро приемлет, всемилостива бо сущи, милости Твоея источник в чудотворнем образе Твоем нам zde являеши, да славим имя Твое преблагословенное во веки.

Слава, и ныне: Исполнение закона и пророков рождающая, Христа Бога, исполни радости и веселия всех, чтущих святую икону Твою, Владычице, да, светло днесь празднующе, Тя радостно воспоем и любовь имя Твое прославим, яко Ты еси едина от всех родов избранная, благословенная и препрославленная.

Песнь 4

Ирмос: Седяй в славе на Престоле Божества во облаце легце, прииде Иисус Пребожественный нетленною дланию и спасе зовущия: слава, Христе, силе Твоей.

Пресвятая Госпоже Богородице, услыши молитву раб Своих, молящихся Тебе.

Иже в бедах сущии человецы, ведите, яко близ вас избавление верное обретается, аще токмо с верою сие призывати будете, сиче глаголюще: о, Владычице, помози и прости нас грешных, о нас милосердовавши.

Пресвятая Госпоже Богородице, услыши молитву раб Своих, молящихся Тебе.

Вемы, Владычице, вемы, яко веры исполненная молитва Тобою не отщется; но

сицевыя веры лености ради наша не стяжахом, аще и стяжати возжелехом. Темже и вопием: веруем, Пречистая, помози нашему маловерию.

Пресвятая Госпоже Богородице, услыши молитву раб Своих, молящихся Тебе.

Широкий путь жития зле возлюбихом, Богородице, к погибели сыны своя влекущий и веру их сокрушающий; но пред святою Твоею иконою предстояще, покаяние о сем приносим и помощи Твоя смиренно просим, во еже на путь спасения обратитися.

Пресвятая Госпоже Богородице, услыши молитву раб Своих, молящихся Тебе.

Еже ко временному житию потребное в мале полезно есть, но паче сих о сухости сердец наших восплачем, о братие, и исцеления страстей наших просити потщимся, греховное житие свое окаявше и горних даров тепле возжелевше.

Слава: Ядом страстей извращена ми душа, и нозе мои по пути спасения ходити не возмогут, аще не Твоим, Пречистая, предстательством благодатную обрящу помощь, во еже на путь правый устремити души моя шествие.

И ныне: Церковь, в нейже икона Твоя пребывает, Богородице, врачевница недугов телесных и душевных является, веры же учительница и неверия явная обличительница.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Песнь 5

Ирмос: Ужасошася всяческая о Божественной славе Твоей: Ты бо, неискусобрачная Дево, имела еси во утробе над всеми Бога и родила еси безлетнаго Сына, всем воспевающим Тя мир подавающая.

Пресвятая Госпоже Богородице, услыши молитву раб Своих, молящихся Тебе.

Людей мольбы и славословия, пред чудотворным Твоим образом и на всяком месте возносимыя, благоутробно, Владычице, приими, и, узами Твоя любви души наша пророчески связавши, сия в Небесное привлецы Царство, и тамо Твоему лицу поклонитя сподоби.

Пресвятая Госпоже Богородице, услыши молитву раб Своих, молящихся Тебе.

Благочестно отвсюду, о Богомати, к чудотворней иконе Твоей притекающим и усердно поклоняющимся милостей Твоих и щедрот не лишаеши, от бед сия спасаеши, от недуг избавляеши, духи лукавыя от них прогоняеши, утешение же и здравие всем подаючи, яко всеблагая.

Пресвятая Госпоже Богородице, услыши молитву раб Своих, молящихся Тебе.

К Твоей, Дево, прибегаем благости, и очи сердец наших к Тебе, Чистая, возводим: не презри воздыханий наших молитвенных, но буди нам покров и помощница в день судный.

Пресвятая Госпоже Богородице, услыши молитву раб Своих, молящихся Тебе.

Освящение, здравие и спасение душам и телесем нашим, Мати Божия, от святых Твоя иконы подаеши, ейже благочестно поклоняемся и усты и сердцем благоговейно сию целуем, Твоя чудеса и неисчетную милость к христианскому роду присно славяще.

Слава: Известная верных еси помощница и всяких благ подательница, Пречистая Дево, иконою бо Твоею чудотворною неисчетныя милости просящим подаеши и вся спасаеши, иже Тебе верно вопиют от души: помилуй и спаси нас, Владычице.

И ныне: Мати Божия всеблагая, милосердых щедрот Твоих не лиши нас,

обнищавших во гресех, и от челюстей мысленного волка исхити души наша, да не погибнем до конца, но приносим присно плоды покаяния Богу.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Песнь 6

Ирмос: Божественное сие и всечестное совершающе празднество, богомудрии, Богоматере, приидите, руками воспещим, от Нея рождшагося Бога славим.

Пресвятая Госпоже Богородице, услыши молитву раб Своих, молящихся Тебе.

О, преславных чудес Твоих, Владычице, и многого Твоего к человеку сострадания: единым бо прикосновением к иконе Твоей немощныя врачуеши, и издалече, в сонних и видениях, к ней требующих Твоего заступления призывавши.

Пресвятая Госпоже Богородице, услыши молитву раб Своих, молящихся Тебе.

Вода освященная и елей от лампы иконы Твоя святыя недуги неисцельныя, Богородице Дево, врачуют и оныя с верою приемлющим во исцеление и спасение бывают; сего ради Тя, Целительницу, ублажаем, и чудеса Твоя, от иконы Твоя явленная и присноявляемая, славим.

Пресвятая Госпоже Богородице, услыши молитву раб Своих, молящихся Тебе.

Расторгни пленицы наших грехопадений, избави от рова страстного жития, и даруй свободу рабом Твоим, Богородице, да скончаем прочее живота нашего в мире и покаянии, уповающе наследити вечную славу.

Пресвятая Госпоже Богородице, услыши молитву раб Своих, молящихся Тебе.

Зряще на Твою, Богородительнице, икону, молим Тя, яко Матерь Света незаходимаго, отжени от нас мрак страстей Того светлостию, да, просвещешся, воспоем: слава силе Твоей, Господи.

Слава: Ты тихое обуреваемым, Богородице, пристанище, Ты радость печалию погруженным, болящим Ты исцеление и покров всем, к Тебе прибегающим, Владычице, едина Чистая и Благословенная.

И ныне: Тя, Богоневесто Чистая, недостойнии раби, славим, лобызающе бренными устны образ Твой святыи, и Тебе молимся со слезами: спаси нас от лютых грехопадений, да избавимся от вечныя муки.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Господи, помилуй (*трижды*). Слава, и ныне.

Кондак, глас 6-й

Бысть чрево Твое святая Трапеза, имущая Небеснаго Хлеба, Христа Бога нашего, от Негоже всяк ядый не умирает, якоже рече всех, Богородительнице, Питатель.

Икос

Како отверзу брэнная уста и воспую Небо одушевленное, Деву Марию, от Неяже нам возсия Солнце мысленное, Христос, просвещаяй всякаго человека? Не доумеем бо ум мой, безгласием язык связуется. Но к чудес виновней Тоя иконе зряще, ангельски воспоем, глаголюще: радуйся, неистощимое сокровище благодати; радуйся, чудес неизследимая пучино. Радуйся, всем верным Божественное услаждение; радуйся, скорбящим всерадостное веселие. Радуйся, обидимым скорое

избавление; радуйся, в житейском мори спасительное окормление. Радуйся, обуреваемым страстями тихое пристанище; радуйся, оружие, во брани мысленной противныя поражающее. Радуйся, молнии, поपालяющая диавола; радуйся, врачевство, болезни вся исцеляющее. Радуйся, миро благовонное всему миру; радуйся, горо, вся осененная Божеством. Радуйся, Дево, всех благих виновная верным; радуйся, Невесто Невестная.

Песнь 7

Ирмос: Не послужиша твари Богомудрии паче Создавшего, но огненное прещение мужески поправше, радовахуся поюще: препетый отцев Господь и Бог, благословен еси.

Пресвятая Госпоже Богородице, услыши молитву раб Своих, молящихся Тебе.

Неисповедимое чудес море вемы Тя, Богородице, паче бо ума и слова оными Ты прославилася еси. Тем ныне, яко Матерь Божию, в песнях Тя славим, раби Твои, благодарственно.

Пресвятая Госпоже Богородице, услыши молитву раб Своих, молящихся Тебе.

Живоносный источниче, Богородице Дево, зноем страстей палимую мою душу напои благодатными струями Сына Твоего, и услади горесть сердца моего зрением святого образа Твоего.

Пресвятая Госпоже Богородице, услыши молитву раб Своих, молящихся Тебе.

Непостыдную предстательницу нам дарова, икону Матери Своея, иже Ея зряще, веселимся и умильно зовем: помози, Владычице, всем, и от всех злых спаси, и Царствию Небесному сподоби.

Пресвятая Госпоже Богородице, услыши молитву раб Своих, молящихся Тебе.

Тобою вси спасаемся и от находений диавольских свободяемся. Тя Бог показа нам заступницу и Твою честную икону нам дарова, Ейже вопием: Владычице, помози, и от всех злых человек спаси, и Царствию Небесному сподоби.

Слава: Не умолчим, Владычице, чудеса Твоя, яко Своею честною иконою всех спасаеши и страждущих от бед избавляеши, недужным цельбы подаеши, и нас от всех злых спаси, и Царствию Небесному сподоби.

И ныне: Пение от недостойных раб прими, Мати Христа Бога, и не отрини мене от Своего пречистаго лица, но спаси от злых всех, и Царствию Небесному сподоби.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Песнь 8

Ирмос: Отроки благочестивыя в пещи Рождество Богородичо спасло есть, тогда убо образуемое, ныне же действующее, вселенную всю воздвизает пети Тебе: Господа пойте, дела, и превозносите Его во вся веки.

Пресвятая Госпоже Богородице, услыши молитву раб Своих, молящихся Тебе.

Приидите, вси вернии, воспоем Пречистую Деву Марию и честному Ея образу поклонимся, вопиюще от сердца: радуйся, Гавриилово благовещение; радуйся, Царя Христа восприимши и на руку Своею держа, яко солнце. Того моли, Чистая, от злых спасти душу мою.

Пресвятая Госпоже Богородице, услыши молитву раб Своих, молящихся Тебе.

Божественная Твоя иконы святое явление, яко солнце, возсия в сердцах, луча всечестная просвещает светом Своим всех, вопиющих Ей: радуйся, благая наша предстательнице и скорая помощнице, славословящих Тя, Пречистая, помилуй нас.

Пресвятая Госпоже Богородице, услыши молитву раб Своих, молящихся Тебе.

Правоверно чтущих Тя, Царицу всех Бога, и Твоей чудней иконе святей любезно поклоняемся, вопиюще: о, Божия Мати, спаси от клеветы злых человек и избави мя, славословящаго Тя, и помилуй.

Пресвятая Госпоже Богородице, услыши молитву раб Своих, молящихся Тебе.

Божественней Твоей иконе поклоняемся, Богородице Дево, просяще от Тебе великия милости, юже даруй рабом Своим, едина Чистая, и от всякия злобы избави, и славословящих Тя, Пречистую, помилуй.

Слава: Взираю на Божественный образ Твой, и чту Владычню Божию Матерь, и взираю на подобия пречистаго Ея лица зрак, поклоняюсь и вопию: Дево Богородице, чтущих Тя, Многопетую, во веки сохрани.

И ныне: Приими песнь исходную, Мати живаго Бога, и спаси всех, верно поклоняющихся святому Твоему образу и чудотворней иконе и вопиющих Тебе, Богородительнице: молися, Пречистая, Сыну Своему, помилуй от всех злых.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Песнь 9

Ирмос: Всяк земнородный да възграется, Духом просвещаемь, да торжествует же безплотных умов естество, почитающее священное торжество Богоматере, и да вопиет: радуйся, всеблаженная Богородице, Чистая Приснодево.

Пресвятая Госпоже Богородице, услыши молитву раб Своих, молящихся Тебе.

Богородице пречистая, аще и многогрешни суть людие, в Твой святыи храм притекающии, но якоже Сын Твой спасения ради грешник от небес к нам пришел есть, тако и Ты от небесных кругов на моления наша призри и прошений людей Твоих не презри, Всепетая.

Пресвятая Госпоже Богородице, услыши молитву раб Своих, молящихся Тебе.

Да утверждается Православная вера умножением исцелений, от Твоея чудотворныя иконы, о Владычице, бываемых, да прославляется в людех Твое предстательство, паче же над страстьми победою увенчай наша zde возносимыя Тебе молитвы.

Пресвятая Госпоже Богородице, услыши молитву раб Своих, молящихся Тебе.

Твоей чудотворней иконе, Пречистая, поклоняясь и сию благоговейно лобызая, о своих же грехопадениих ужасаяся, сице реку: аще подобает мне их ради скорби приимати, терпения дар молитвою Твоею мне низпосли.

Пресвятая Госпоже Богородице, услыши молитву раб Своих, молящихся Тебе.

Отечество наше, Владычице, паче всех стран земли чудотворными иконами Твоими просветила еси, яже, аки звезды небесныя, ночь земнаго жития нашего освещают и по пути правому ходити нас научают.

Слава: Множеству людей, семо притекающему, многая дарования от чудотворныя иконы Божия Матере подаются, от нихже лучшее есть, еже в чувство покаяния приити и на деяния благая устремитися. В сем убо помощь Твою яви мне, Пречистая.

И ныне: Помощи Богородицы Пречистыя, о братие, мнози свидетелие zde обретаются, нашему же нерадению обличителие, темже чудотворней иконе Владычицы предстояще, к покаянию теплому устремим душ наших шествие.

Спаси от бед рабы Твоя, Богородице, яко вси по Бозе к Тебе прибегаем, яко нерушимей стене и предстательству (*поклон*).

Тропарь, глас 4-й

Днесь притецем, вернии, к Божественному и пречудному образу Пресвятыя Богоматере, напоющей верных сердца небесною неупиваемою чашею Своего милосердия и людем верным чудеса показующей. Яже мы видяще и слышаще духовно празднуем и тепле вопием: Владычице премилостивая, исцели наша недуги и страсти, молящи Сына Твоего Христа Бога нашего спасти души наша.

Кондак, глас 6-й

Слава, и ныне: Бысть чрево Твое святая Трапеза, имущая Небеснаго Хлеба, Христа Бога нашего, от Негоже всяк ядый не умирает, якоже рече всех, Богородительнице, Питатель.

Молитва

О, Премилостивая Владычице! К Твоему заступлению ныне прибегаем, молений наших не презри, но милостивно услыши нас, жен, детей, матерей, и тяжким недугом пьянства одержимых и того ради от матери своея, Церкви Христовы, и спасения отпадающих братий и сестер и сродник наших исцели. О Милостивая Мати Божия, коснися сердец их и скоро возстави от падений греховных, ко спасительному воздержанию приведи их. Умоли Сына Своего, Христа Бога нашего, да простит нам согрешения наша и не отвратит милости Своея от людей Своих, но да укрепит нас в трезвении и целомудрии. Приими, Пресвятая Богородице, молитвы матерей, о чадах своих слезы проливающих, жен, о мужех своих рыдающих, чад, сирых и убогих, заблудшими оставленных, и всех нас, к иконе Твоей припадающих. И да приидет сей вопль наш, молитвами Твоими, ко престолу Всевышняго. Покрый и соблюди нас от лукаваго ловления и всех козней вражиих, в страшный же час исхода нашего помози пройти непреткновенно воздушныя мытарства молитвами Твоими, избави нас вечнаго осуждения, да покроет нас милость Божия в нескончаемая веки. Аминь.